

■ COLUMNA

Dar schlops a quels sisum

DA BERNARD CATHOMAS

Donald J. Trump vegn pia president dals Stadis Unids. Ed el vegn a trumpar. Per franc. Dad in naziunalist e rassist n'han ins anc mai pudì spetgar insatge bun. Mai. Cun in tal president american vegn il mund pli dir, pli malsegir, pli stgir.

El vegn a trumpar sias electuras e ses electurs che spetgan ch'el gidia quels en miseria. Fin uss ha el gidà mo sasez. El vegn a trumpar quellas e quels che crain ch'el saja abel da stgatschar sis milliuns immigrants ord l'America. Ina nauscha illusiuin. El vegn a trumpar quels che spetgan ch'el construeschia il pli grond mir dal mund sin il cunfin cun il Mexico. Ina fantastaria. E quels che san che l'America po esser gronda be en contact e barat cun l'entir mund, mai persula. Anc per blers auters vegn la trumpada ad esser massiva.

Mo ella para necessaria. Temps nua ch'i va bain leventan levsenn. Trump vegn a far sentir blers vid l'agen corp che la politica da fin uss n'è betg stada uschè mala sco ella vegn fatga. Bliers manaders



han fatg e fan ina politica ch'augmenta la segirtad sociala, porta bainstanza creschenta a fitg blers e segirescha la pasch.

Tge fan ils milliuns main bainstants en l'America sche l'assicuranza da malsausn obligatoria vegn dismesa? Tgi patescha sche la taglias dals ritgs vegnan reducidas e las mesiras per proteger l'ambient abolidas? A cust da tgi van las pajas per la massa da diplomats che han da cuntchar e cumadar quai che quest president fa empaglia? Betg da s'imaginar tge che succeda, sche Trump sa metta encunter la Nato e la China.

Ins auda e vesa en la televisiun che glied che viva en paupradad ha er elegì quest president. Probabel dovri la trumpada per puspè far chapir che votar mo per dar in sfratg a

quels ch'èn a la testa po la finala esser ina frida a sasez.

Pietro Parolin, il secretari da stadi dal Vatican, animescha da rugar ch'il Segner illumineschia e sustegna il nov president. Papa Franciscus è pli sever. A chaschun da sia visita en il Mexico ha el ditg da Trump che ina persuna che fa mirs empè da construir punts n'è betg cristiana. Urar san ins sa chapescha er per betg cristians. Tge che Trump crai u na crai er adina astg'ins tuttina sperar che la devisa: «Wem Gott ein Amt gibt, dem gibt er auch Verstand», valia er per el. Er sche jau hai in pau difficultads da chapir che Dieu haja dà quest uffizi gist a quest um.

Quai che succeda en l'America vegn er tar nus. Il pensar ed agir che han purtà success a Trump chattain nus gia oz er en l'Europa, en Svizra, en il Grischun, tar nus. Er qua vegn mintgatant betg decidì per la chaussa e per soluziuns cun avegnir, mabain per dar schlops a quels sisum. Il privel da far mal a sasez è grond. Quai ves'ins magari pir cur ch'igl è memia tard. Mintgatant dovri oramai ina tuppada per vegnir pli perdert.